



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Distritu Manufahi
20 Outubru 2014

Komunidade Suku Babulo primeira-vez simu trenamentu husi JSMP

Iha 16 Outubru JSMP liuhosi Unidade Peskizador Jurídiku no Unidade Outreach fasilita trenamentu kona-ba justisa ba ema hotu iha comunidade Suku Babulo, Sub-distritu Same, Distritu Manufahi.

Trenamentu ne'e partisipa hosi ema hamutuk na'in 31 ne'ebé kompostu hosi feto sanulu resin ida (11) no mane nain rua nulu (20).

Materia trenamentu kona-ba sistema justisa formal ho ninia lalaok, intrudusaun baziku kona-ba direitus umanus, lei formal ne'ebé vigor iha Timor Leste, tipu kazu krime tuir lei aplikavel no oinsa atu asesu ba justisa formal wainhira sai nu'udar akuzadu ka sai hanesan vítima hosi krime ruma.

"JSMP iha komitmentu atu kontinua habelar informasaun kona-ba justisa ba comunidade sira hotu iha área rural sira. Hein katak liuhosi trenamentu ne'e bele hasae no hametin liu tan comunidade sira nia komprensaun kona-ba lalaok hosi sistema justisa formal ho nia natureza tomak," dehan Diretor Executivo JSMP, Luis de Oliveria Sampaio.

Partisipante sira hatudu antusiasmu durante fasilitador sira fahe informasaun relasiona ho materia ne'ebé hatoo ba sira. Partisipantes sira subliña katak trenamentu ne'e foin primeira-vez ba sira simu informasaun kona-ba oinsa trata kazu tuir sistema formal no oinsa atu asesu ba justisa formal.

Xefi Suku mós rekoñese katak trenamentu ne'e importante ba sira no liuhosi trenamentu ne'e bele ajuda sira wainhira resolve kazu tuir sistema formal.

"Trenamentu ida nee hanesan pasu importante ida mai ami nia suku atu ami nu'udar lideransa komunitáriu bele hatene no kompriende lalaok hosi prosesu justisa formal no oinsa bele resolve kazu sira," dehan Xefe Suku Babulo Sr. Henrique dos Reis.

Durante prosesu trenamentu ne'e partisipante sira ativu tebes hodi husu perguntas liu liu kona-ba prosesu atu resolve krime violénsia doméstika, violasaun seksuál no preokupa mós kona-ba kompetensia Prezidente da República kona-ba indultu.

Trenaimetu nee realiza tanba hetan apoiu husi UNDEF. Tuir planu trenaimetu hanesan ne'e sei hala'o iha Outubru 2014 iha Distritu Oe-Cusse.

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883 | 77295795

Website: www.jsmp.tl

Face book: www.facebook.com/timorleste.jsmp

Twitter: @JSMPtl